

**Kalaallit Nunaani eqqartuussisarnermi inatsisip, Meeqqat inatsiseqartitaanerannik Kalaallit Nunaanni inatsisip, aappariilersarneq aappariikkunnaartarnerlu pillugit Kalaallit Nunaannut inatsisip aamma aappariinnermi inatsisitigut kingunerisassat pillugit Kalaallit Nunaannut inatsisip allangortinneqarnissaannik inatsit pillugu Inatsisartut aalajangiiffigisassaattut siunnersuut (Kalaallit Nunaanni kingornussisarneq agguasarnarnerlu pillugit inatsisit nutarterneqarnerisa kingunerisaanik allannguinerit) (Meeqqanut, Inuusuttunut Ilaqutariinnullu Naalakkersuisoq)**

### **Saqqummiussissut**

(Meeqqanut, Inuusuttunut Ilaqutariinnullu Naalakkersuisoq)

### **Siullermeerneqarnera**

2021-imi ukiakkut ataatsimiinnermi Kingornussisarnermik inatsisip, aappariit pigisaasa agguarnerat pillugu inatsisip, toqusup pigisaasa agguarneqarnerat pillugu inatsisip aamma eqqartuussisarnermik inatsisip, akiliisinnaajunnaarneq pillugu inatsisip, eqqartuussivikkoortumik nalunaarsuineq pillugu inatsisip, aappariinnerup inatsisitigut sunniutai pillugit inatsisip kiisalu inatsisit allat allangortinneqarnerisa (Toqusup pigisaasa agguarnerat pillugu inatsisip malitsigisaanik allannguinerit) Kalaallit Nunaanni atuutilersinneqarnerannik peqqussutissatut missingiummut Namminersorlutik Oqartussat isumaqataanerat pillugu Inatsisartuni aalajangiiffigisassatut siunnersuut Inatsisartut suliaraat. Aalajangiiffigisassatut siunnersuut Inatsisinut ataatsimiititaliami suliarineqartussanngorlugu innersuussutigineqarpoq.

Kisianni tamatuma peqatigisaanik inatsisini allani aamma naleqqussaasoqarsimatinnagu, peqqussutit taakku atuutsinneqalersinnaanngillat.

Suliassaqarfinni tiguneqarsimangitsuni inatsisiliorneq, qallunaat malittarisassaannik peqqussusiornikkut imaluunniit Kalaallit Nunaannut atuuttussaannartut folketingimi inatsisiliorikkut naammassineqarsinnaavoq. Kingornussisarnermut inatsit, aappariit pigisaasa agguarneqartarnerat pillugu inatsit aamma toqusup pigisaasa agguarneqartarnerat pillugu inatsit inatsisilik peqqussusiarineqarsimasunik allanik allannguinerit imaqarput. Kisianni peqqussut inatsimmik allannguisinnaanngilaq.

Taamaammat immikkut ittumik aalajangiiffigisassatut siunnersuutip matuma saqqummiunneqarnissaa pisariaqarpoq, taannalu Kalaallit Nunaannut folketingip inatsisiliaasa allangortinneqarnissaannut missingiummik imaqarpoq. Ilaatigut eqqartuussisarnermi inatsimmi eqqartuussiviit suliassat pillugit aalajangersakkat aamma aappariinnermi inatsisitigut kingunerisassat pillugit inatsit, tassani aappariinnerup nalaani pisuussutit agguarneqartarnerannut killissaliussisoqarluni, uani pineqarput.

Taama oqaaseqarlutik immikkoortoq Inatsisartuni suliarisassanngorlugu Naalakkersuisut tunniuppaat.